

PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KEDUA
PARLIMEN KEEMPAT BELAS (2019)

PERTANYAAN : LISAN

**DARIPADA : YB DATO' SERI HAJI ABDUL HADI BIN AWANG
[MARANG]**

TARIKH : 10 JULAI 2019 (RABU)

SOALAN

Dato' Seri Haji Abdul Hadi bin Awang [Marang] minta **PERDANA MENTERI** menyatakan apakah langkah Kerajaan untuk memperkasakan Mahkamah Syariah khususnya untuk memberi peluang hukuman takzir dapat dilaksanakan serta menyelesaikan ketidak seragaman yang nyata dalam penjenayahan takzir mengikut Enakmen Kesalahan Jenayah Syariah Negeri-Negeri dan Akta Kesalahan Jenayah Syariah (Wilayah-Wilayah Persekutuan) 1997 [*Akta 559*].

**JAWAPAN: (YB DATUK SERI DR. MUJAHID BIN YUSOF, MENTERI DI
JABATAN PERDANA MENTERI)**

Tuan Yang di-Pertua,

Untuk makluman Ahli Yang Berhormat, hukuman bagi kesalahan-kesalahan yang terdapat dalam Akta Kesalahan Jenayah Syariah (Wilayah-Wilayah Persekutuan) 1997 [Akta 559] adalah hukuman ta'zir. Walau bagaimanapun, hukuman ta'zir yang terdapat dalam Akta 559 pula adalah terbatas dengan peruntukan di bawah Akta Mahkamah Syariah (Bidang Kuasa Jenayah) 1965 [Akta 355].

Kerajaan akur dan akui bahawa terdapat ketidak seragaman yang nyata dalam penjenayahan takzir bagi setiap undang-undang kesalahan jenayah syariah negeri-negeri di seluruh Malaysia.

Oleh itu, bagi menyelesaikan isu ketidak seragaman yang nyata ini, Kerajaan melalui Jawatankuasa Teknikal Undang-Undang Syarak dan Sivil juga sentiasa berusaha untuk menggubal draf model undang-undang syariah bagi tujuan penyelarasan dan penyeragaman undang-undang negeri-negeri di seluruh Malaysia. Antaranya, Kerajaan sedang dalam proses untuk menyeragamkan undang-undang kesalahan jenayah syariah negeri-negeri seluruh Malaysia dari segi jenis kesalahan, jenis hukuman dan kadar hukuman.

Selain itu, beberapa penambahan peruntukan yang baharu akan turut dibuat, antaranya peruntukan yang memberikan budi bicara kepada mahkamah syariah untuk membuat perintah-perintah yang bersifat pemulihan (rehabilitative) agar undang-undang kesalahan jenayah syariah negeri-negeri yang seragam kelak tidak dilihat hanya bersifat menghukum (punitive) semata-mata.

NO. SOALAN: 41

Terdapat juga beberapa penambahbaikan lain yang akan turut digubal, antaranya dengan memasukkan atau memperkemas elemen-elemen kesalahan bagi kesalahan-kesalahan tertentu. Penambahbaikan tersebut dibuat bagi memudahkan pihak penguatkuasaan mengumpul keterangan dan pihak pendakwa membuktikan sesuatu kes di mahkamah.

Cadangan penyeragaman undang-undang kesalahan jenayah syariah ini telah dibentangkan dan dipersetujui oleh Majlis Kebangsaan Hal Ehwal Ugama Islam (MKI) pada 13 Jun 2019. Ia juga telah dibentangkan kepada negeri-negeri di bawah naungan DYMM SPB Yang di-Pertuan Agong iaitu, Wilayah-Wilayah Persekutuan, Sabah, Sarawak, Pulau Pinang, Melaka dan Pahang semasa sesi Majlis Munaqasyah Pengurusan Hal Ehwal Islam Negeri-Negeri di bawah naungan SBP Yang di-Pertuan Agong di Istana Negara pada 20 Jun 2019.

Cadangan draf model undang-undang syariah ini akan dibentangkan kepada negeri-negeri di seluruh Malaysia untuk mendapatkan maklumbalas dan pandangan melalui forum-forum seperti Majlis Dialog Undang-Undang dan Persidangan Penyelarasan Undang-Undang Syarak dan Sivil.

Setelah persetujuan negeri-negeri di seluruh Malaysia diperoleh, draf model undang-undang kesalahan jenayah syariah ini akan dikemaskini, ia kemudian akan diangkat ke MKI dan Majlis Raja-Raja (MRR) untuk perkenan dan seterusnya dikemukakan kepada Jabatan Peguam Negara (JPN) untuk kelulusan sebelum dibentangkan di Parlimen.

Sekian, terima kasih.